

### He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.

### He whakarāpopoto

Pānuitia te whakarāpopoto ki te ākonga. He aha te mahi a te kererū? Mā wai tāna mahi?

### He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me te āta whakamahi i te papa kupu me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Matapakia te āhua, nohonga me ngā kai a te kererū. He manu parahau te kererū.

### He Matapaki

#### Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tātari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei:
  - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
  - te pātai mō tētahi āhuatanga o te pakiwaitara, arā, te kaupapa, te ritenga, ngā ariā mātua, te raupapatanga, ngā kiripuaki;
  - te whakatenatena i te ākonga ki te titiro ki mua, ki te matapai hoki, i te wā o te whakataki.



### Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini kōpae puoro, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

### He whakapuaki māramatanga

1. He aha te kaupapa o tēnei pukapuka?
2. Mā ngā aha e āhei ana te kererū ki te rere?
3. Kei whea te pīpī kererū e noho ana?
4. Ka tiki te pīpī kererū i tōna kai i whea?
5. Ko wai kei te whāngai i a koe?

### Ngā whakautu ki ngā whakapuaki māramatanga

1. He paki mō tētahi kererū e whāngai ana i tōna pīpī.
2. Mā ngā parirau.
3. Kei roto i te kōhanga.
4. I te waha (me te korokoro) o tōna māmā.
5. Ka rerekē ngā whakautu.

### He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

### Te pūtake

**T** He tāutu i tētahi raupapatanga.

### He whakatakinga ā-roro, he whakaharatau

I mua i te pānui pukapuka, matapakia ngā momo manu e mohiotia ana e te ākonga. Matapakia ngā mahi a te kererū. Kia oti i te ākonga te pukapuka, matapakia he whakaari mō tēnei pukapuka.